

## 1175 mol Hall die Gail

Ei om Somsdaach sinn merr widder beim Nannclub gewese unn hawwe enn scheene Owend gemacht kriecht. Also dess mussde dene schunn losse, die kenne Leit unnerhalle unn ferr ihr Sach, de Fassenachtszuch, Stimmung mache. Awwer e bisje was gibt's halt zu erzehle.

Doo hawwe gleich noochdem die Klennste vom Nannclub, die Wichtel, uffgetrete sinn unn die Gard oimarschierd iss, de Beijemooster unn de Willi Lauck e historisch Zwiegespräch gehalle unn hawwe erzehlt, wasses in Flerschem in de letzte 1175 Jahr so alles gewwe hott, weil merr doch diesjohr e Jubiläum hawwe: Flerschem – doomols hott merr noch Flaridesheim geschriwwe – iss im Jahr 828 zum erste Mol inner Urkund erwähnt worrn. Die zwaa hawwe aus dem Jubiläum gleich e narrisch Datum gemacht, weilse alls gerufe hawwe, „die Elf om Oofong die iss wichdich!“ Unn als Bienebild hawwe se die Karthaus genumme, mettem Heiliche Bruno druff, weil der joo im Jahr 1101 gestorwe iss unn deshalb aach so ebbes wie e Jubiläum hott.

Weil die zwaa halt so historisch warn, wars aach gut, dass zur Erinnerung on unser ehemalich kaiserlich Besatzungsmacht e bisje später, noochdem e paar Mädcher ihr Händ unn Fieß unn sunnst ebbes schwingen konnde, en Preis in die Bitt gelosse hawwe. Awwer mittlerweile sinn merr joo gute Hesse unn doo derf schunn emol ooner uff die Bolitik schenne.

Dess hott dess Nochberschafts-Pärche später aach gemacht, awwer als se sich iwwern Bökel unn dann iwwern Möllemonn ausgelosse hawwe, habb ich doch ebbes iwwer die Schwarze vermisst, weeche dem ausgewoochene Gleichgewicht. Awwer dess hawwe die zwaa halt doch noch uff die Reih kriecht, weilse dann ebbes iwwer en Mohr unn iwwer de Koch gesacht hawwe - no ja, doo war halt nor de Koch von de Stadthall gemoont, awwer immerhie! Als se dann noch Schleichwerbung ferr dem Sievers soi Leserreise gemacht hawwe, war ich werre zefridde, schließlich schreib ich joo monchmol ferrs Flerschemer Blättche, doo kann e bisje Werbung ferr die Firma nit schade.

Gut gefalle hott merr aach die Kavallerie. Gail um de Bauch erumm hawwe so e paar Kerle e prima Nummer uff die Bien gebrocht. Zuletzt hosde awwer geseh, dass, weil die stromme Ritter 1175 mol Hall die Gail gesunge hawwe, nit nor dene Gailsattrappe vor Dorscht die Zung aussem Hals gehonke hott.

Als merr gemoont hawwe, es wär bald Schluss, doo kumme doch noch en Haufe Böppcher unn drei Stemmer dorch de Saal unn hawwe uff de Bien so en afrikanische Donz gemacht. Die sinn villeicht erumm gehippt! Unn wie die dann so uffenonner geklettert sinn unn sich entblättert hawwe – nit was ihr moont, naa, die hawwe sich allsesomme präsentiert wie e bundisch Blumm vom Kongo –, doo hawwe merr all minnonner „Zugabe“ gerufe.

Ich habb emol zum Bruno enuff geguckt – dem ahle Oisiedler hawwe zu soim Elfer-Jubiläum die Donzmädcher vorne unn die Leit hinne aach gefalle.

Eiern Honnes